

«La Lia sto marcar preschientscha»

Jon Domenic Parolini ha pledenta la valur da la Lia Rumantscha e ses giubileum

CUN JON DOMENIC PAROLINI
HA DISCURRÌ ANDREAS CADONAU / ANR

■ **L'actual president da la regenza grischuna e schef dal departament d'educaziun, cultura e protecziun da l'ambient, Jon Domenic Parolini, è durant blers onns stà fermamain engaschà en il moviment rumantsch.** Tranter auter ha el gidà a fundar la GiuRu ed ha presidià la cuminanza europeica da las minoritads etnicas. Ha fatg part da la supranza da la Lia Rumantscha ed è stà engaschà intgins onns sco collavuratur da la Lia Rumantscha en l'Engiadina. *Jon Domenic Parolini*, in expert en dumondas Lia Rumantscha, è stà pront da s'exprimer davart l'organisasiun tetgala rumantscha e ses anniversari da 100 onns.



Jon Domenic Parolini, in expert en dumondas Lia Rumantscha, è stà pront da s'exprimer davart l'organisasiun tetgala rumantscha e ses anniversari da 100 onns.

Jon Domenic Parolini, persunas da lingua rumantscha activas en la politica e cultura èn insacura vegnidas en contact cun ina da las organizaziuns rumantschas. Tar Vos è quai probabel stà baud il cas?

Jon Domenic Parolini: Ni tar la fundaziun da l'Uniuin dals Grischs ni tar la fundaziun da la Lia Rumantscha sun jau stà da la partida.

Inizià fundaziun da la GiuRu

Na, na per uschè vegl n'hai jau vaira-main betg schazegià Vos?

Il emprim contact cun il moviment rumantsch respectiv cun l'Uniuin dals Grischs èn succedids via il Chalender Ladin che pendea tar nus a chasa en stiva. Pli tard sco scolar da scola media sco student haj jau gi contact cun l'UdG e la LR.

En diversas funcziuns ed activitads?

Gea ed oravant tut perquai che nus eran sco giuvenils e students interessads da s'engaschar per la lingua e cultura rumantscha. Nus avain gi la pussaivladad da ir a las scuntradas da la giuventetgna da las cuminanze etnicas europeanas e dad ina da quellas scuntradas sun jau turnà sco president da quella cuminanza europeana.

Quai nun è stà il sulet champ d'engaschi?

Na, a Scuol avain nus, intgins giuvens e giuvnas, instradà l'acziun fatscha rumantscha Scuol analog a las activitads da *Carli Scherrer* a Trun per intimar las fatschentas da resguardar la lingua rumantscha sin ils placats da reclama. Ed a chaschun da la scuntrada rumantscha a Laax 1991 hai jau inizià la fundaziun da la Giuventetgna Rumantscha, jau hai era preparà ils statuts per la GiuRu. La fin finala sun jau stà in pèr onns en la supranza da la Lia per lasuenter surpigliar in'incumbensa parziala sco collavuratur regional en l'Engiadina.

Vus essas in cler mussament ch'ins po far ina carriera politica era sco promotur dal rumantsch?

Entras differents engaschis hai jau emprendì d'enconuscher bleras Rumantschas e blers Rumantschs en l'intschess ladin, en Sur- e Sutselva sco er en Surmeir. La fin finala sun jau turnà en l'En-



Enconuscha la Lia Rumantscha entras diversas atgnas activitads en il moviment rumantsch: Il president da la regenza grischuna e schef dal departament d'educaziun, cultura e protecziun da l'ambient Jon Domenic Parolini.

FOTO Y. BÖRKLJ

giadina era perquai ch'jau vulev m'engaschar politicamain.

Ils onns 80 e 90 èn stads in pau extraordinaris en l'istoriga da la Lia?

Quai è cler, cun *Bernard Cathomas* sco secretari general han diversas activitads dà in grond impuls al moviment rumantsch. Da quel temp deriva era la fundaziun da la Pro Svizra Rumantscha cun la finamira da metter en pe ina gasetta dal di rumantscha cun Toni Cantieni sco president ed jau hai surpiglià il vicepresidi. E da quellas activitads è naschida la Agentura da novitads rumantscha. E sco president da quell'instituziun (dal 1996 fin il 2014) dessi blier da raquintar gia davent da l'entschatta da si'existenza.

Blers politichers rumantschs din ch'i saja meglier dad ir sin distanza al moviment rumantsch. La maioritad tudestga n'onureschia betg quel engaschi. Ed entaifer la Rumantschia sa chattan ins bainduras svelt tranter sutga e banc?

Quai è probablmain uschia, sa profilar per ina maioritad dal pievel grischun sco politicher da lingua nun è forsa tant sexy. Pero jau stun tar mia identitad e hai m'engaschà fin uss e m'engasch er actualmain sco responsabel per la cultura e scolaziun per in chantun triling. Per la Rumantschia è la dumonda da la basa economica en las regiuns fitg impurtanta. Sch'i dat plazzas da lavur en las regiuns rumantschas èsi pli simpel da mantegnair la lingua.

Basa economica impurtanta

Bleras Rumantschas e blers Rumantschs na vivan betg pli en las regiuns?

Igl è in fatg che blers van davent per la scolaziun e na turnan betg pli. Per mai èsi impurtant da pussibilitar er a quella diaspora en u ordaifer il chantun da pudair dar inavant la lingua a la proxima generaziun. I dovra dentant blier dapli sforzs da mantegnair il rumantsch per ina famiglia che crescha si per exempel a Turitg, quai è cler. E lura dastga sa chapescha menziunar la gronda muntada da la preschientscha da la lingua en las

medias tradiziunals e novissimamain en la rait sociala.

Gist la Televisun Rumantscha avra ina porta da promoziun vers la Bassa per l'entir chantun Grischun?

Quai è uschia, blera glieud da lingua tudestga guarda quellas emissiuins e po chapir grazia als sottitels quai ch'els vesan, per regla bels purtrets da persunas e da la cuntrada dal Grischun. Includa la Viafier retica.

Preschientscha en las medias

I dat en la politica grischuna persunas che scusseglia a la Lia da s'engaschar politicamain tenor il motto: «Sa fatschentai vos cun la cultura e surlaschai la politica a nus.» Co vesa il minister da cultura grischun quai?

La Lia Rumantscha duess bain prender posiziun areguard politica da lingua e da cultura. Quai è ina part da sia incumbensa. Là posseda ella ina tscherta cumpetenza davart las mesiras necessarias per mantegnair il rumantsch. Ord mia vista è la Lia in partenari da discussiun per mes departament sco era la Pro Grigioni Italiano ed autras gruppas d'interess. Tar la gruppa rumantscha en il cussegl grond che sa scuntra tenor basesegn gioga la Lia er ina rolla da clav. E la Lia marchescha era preschientscha en la chasa federala dapi in pèr onns e fa là lavur da lobbying.

Sco gruppa d'interess en l'ambient dal parlament grischun è la Lia preschienta?

Naturalmain ha la Lia era contact cun singulas deputadas e singuls deputads, quai enconusch jau da mes temp sco deputà. Quai è legitim e per part vegnan er inoltradas dumondas ch'ins ha l'impressiun ch'ellas sajan iniziadas e coordinadas cun la Lia. Ins po la fin finala lachar avert sche quai è uschia u betg. A mi para quai dentant dad esser l'incumbensa da la Lia, ella sto marcar preschientscha. Ella nun ha dentant simpel da metter sut tetg tut ils interess e tut ils differents aspects da la Rumantschia, quai han ins vesì en connex cun la discussiun rumantsch grischun

davart la legitimaziun democratica da la Lia Rumantscha. Dentant, jau crai che quellas persunas che vulan prender posiziun e s'engaschar per la lingua rumantscha chattan la via da far quai entras la LR e las ulteriuras uniuns existentas.


Nua n'ha la Lia, tenor Voss parairi, betg tutgà la noda en sia istorgia?

Tar l'introducziun dal rumantsch grischun, quai nun è primarmain d'attribuir a la Lia, vesan ins oz ch'ins avess stuì proceder auter. Numnadamain da restar tar l'alfabetisaziun dals idioms e dar paisa al concept da sulettamain intermediar las enconuschientschas passivas dal rumantsch grischun en scola. La populaziun da pliras regiuns n'ha simplamain betg acceptà l'introducziun dal rg via ils meds d'instrucziun en scola, quai è d'acceptar. Co il Surmeir decida vegnin a vesair. Jau crai che las enconuschientschas passivas che lubeschan da legger rumantsch grischun là nua che sulet ina varianta da la lingua rumantscha è pussaivla po esser la soluziun per las proximas generaziuns.

Duess prender posiziun

Tge giavischa il president da la regenza grischuna a la Lia sin ses anniversari da 100 onns?

Ch'ella s'engaschia vinavant per la lingua e cultura rumantscha e sa focussechia anc pli fitg sin temas che mussan l'attractivitat da la lingua rumantscha. La preschientscha rumantscha en il mund digital è da fitg grond'impurtanza per la promoziun dal rumantsch! Jau sper che la LR possia accompagnar quella lingua cun success er ils proxims 100 onns. E quai tant en las regiuns rumantschas sco en la diaspora, quai vul dir dador il territori rumantsch. La LR sto restar averta per svilups novs e metter adina la promoziun efficienta da la lingua rumantscha en il center da sias activitads.



La nova politica da cultura dal chantun.

CARICATURA L. FLEPP